

R E Q V E S T E

PRESENTÉE
A NOS SEIGNEURS DE LA
Cour de Parlement.

Par l'Vniuersité de Paris,
Pour ioindre à celle du 5. Mars.

A NOS SEIGNEURS
DE PARLEMENT.

SUPPLIENT HVMBLEMENT
les Recteur, Doyens, Procureurs & Supposés de l'Vniuersité de Paris : DISANS, que ceux qui se nomment de la Compagnie de Iesvs, pour empescher que la Iustice soit renduë sur la *Requête* présentée à la Cour par l'Vniuersité le 5. de Mars dernier, taschent de faire croire, que la mauuaise doctrine y exposée, est seulement le sentiment d'un particulier de leur Societé : Duquel discours pour faire veoir la fausseté, les *suppliants* remonstrent que ces meschantes instructions n'ont point esté dites en passant, ni en quelque lieu secret, à vn ou à deux particuliers;

A

mais ont esté meditées, redigées par Cas
 escrit, dictées & expliquées de vive F
 voix publiquement, dans le College de 39
Clairmont en cette ville de Paris; non 326
 seulement durant vne année, mais par 1644
 plusieurs de suite, par vn Theologien pa
 choisi de tout le corps de *la Société des*
Jesuites, comme vn des plus parfaite-
 ment instruits en leurs opinions, pour
 les enseigner dans vn des lieux le
 plus considerable de tout leur Ordre.

Ils n'ont point ignoré quels es-
 toient les sentimens & la doctrine
 d'un homme, qu'ils ont élu d'entr'eux
 comme vn des plus capables pour
 estre *Maistre des Confesseurs, Direc-*
teur des Directeurs des ames, Docteur
 de cas de conscience: & en l'establis-
 sant en cette charge & en lui commet-
 tant leur Classe & leur Chaire, ils se
 sont rendus pleiges & garans, & se
 sont faits Autheurs des maximes, qu'il
 a publiées, par le pouuoir qu'ils lui en
 ont donné.

Que s'ils auoient esté si negligens
 en vne élection de si grande impor-
 tance, eux qui sont si exacts en leurs
 moindres affaires; S'ils auoient mis

en vne Classe de cas de Conscience à Paris *vn Professeur* qui leur fust inconnu, ils l'en auroient retiré, ou l'auroient obligé de reuoquer ses mauuaises doctrines, dès aussi tost qu'il les a publiées, si elles n'eussent esté selon leur sentiment, s'ils ne les eussent approuuées.

Vne compagnie de gens si curieux de tout ce qui se passe en l'vn & l'autre monde, ne peut pas ignorer ce que l'on dicte & que l'on interprete publiquement dans le premier des *Colleges* où ils enseignent; Et la discipline & diligence, dont ils se vantent ordinairement, & nommémēt en la page 100. des deux impressions du libelle diffamatoire, dont le tiltre est *RESPONSE au liure intitulé Apologie pour l'Vniuersité de Paris, contre le discours d'un Iesuite*, qu'ils ont fait n'aguères imprimer cōtre les *Supplians*, & la multitude de personnes disposées pour prendre garde tant à leurs Regens que Disciples, leur oste le moyen de pretendre cause d'ignorance de ce que l'on enseigne chez eux.

Outre le *Recteur* du College qui

doit veiller sur tous les Professeurs, il y a vn *Syndic general*, qui doit aduertir le *Recteur*, le *Prouincial* & le *General* touchant les personnes & les choses qu'il iuge à propos, & le *Recteur* a encore se *Syndics particuliers*, qui sont obligez de lui faire rapport de ce qui arriue en chaque classe, afin qu'il y donne ordre: Et le *Recteur*, le *Collateral*, le *Syndic general* & ceux qu'ils nomment *Conseillers*, doiuent escrire touchant les Professeurs & autres *le-suites* chaque année vne fois au *General* & par deux fois à leur *Prouincial*. Leurs *CONSTITVTIONS* y sont expresses, Partie 4. chap. 17. page 176. de l'edition de Rome de l'année 1583. *Erit Syndicus vnus Generalis, qui tam de personis quam de rebus de quibus videbitur, Rectorem & Prapositum Prouincialem, & Generalem admoneat; qui quidem Syndicus vir magna fidelitatis & iudicij esse debebit. Præter hunc, suos habebit Syndicos particulares Rector, ut quæquâvis in classe acciderint, quibus providere oporteat ad ipsum referant, & ut ipse de omnibus Præceptoribus & aliis de Societate; ita*

& collateralis & Syndicus & Confiliarij de ipso, & de alijs scribent semel singulis annis Præposito Generali, & bus Prouinciali, qui Generalem (si quid oportuerit) admonabit; Vt in omnibus maiori cum circumspectione & cura præstandi, quod quisque debet procedatur.

Il n'est pas croyable que tant de Recteurs, de Syndics, de Collatéraux, de Conseillers & Superieurs Surucillans, obligez & dediez à obseruer exactement ce que leurs Professeurs enseignent, aient esté generalement frappez d'un si prodigieux assoupissement, que pas vn d'entr'eux n'eust remarqué tant d'estranges & espouuentables maximes, que leurs Professeur de cas de Conscience dictoit & expliquoit dans vne de leurs classes, les plus importantes: *A tout le moins*, ils en ont esté infailliblement informez & faits participants, par le grád nombre de ceux d'entr'eux qu'ils appellent *Prefets des Chambres*, lesquels estants desia aduancez en aage, Precepteurs des Escholiers leurs pensionnaires, & ayants pour la

pluspart regenté & fait profession publique des lettres humaines, sont tenus & obligez de prendre & prennent en leur College les *Leçons de Theologie* & de cas de conscience

D'ailleurs, attendu les exercices & disputes publiques qu'ils pratiquent ordinairement chez eux, & auxquelles nombre de *Jesuites* & des plus remarquables assistent avec soin pour y faire le choix des esprits qu'ils veulent attirer, retenir. ou diuersement employer en leur Ordre; il n'est aucunement possible qu'un *Lecteur* ait tant enseigné, soustenu & defendu de maximes extraordinaires chez les *Jesuites*, sans leur participation & connoissance; & verra-t'on clairement que ce n'a pas esté sans mystere qu'il a dicté & enseigné les mesme leçons pendant deux années consecutives 1641. & 1642. Auquel temps le pere Royer estoit Prefet des Theologiens, & entre les Prefets de chambres & estudians en Theologie & cas de Conscience estoient les nommez du Fretat, Des-champs, Mangot, Fau-

trell, Leonard, Bourdin, le Cointe, du Sauffoy, Lambert, du Fresne, Poignant, Voisin, Cossard, Arnould, Micauld, Calloite, Reussel, Paruillier, de Villes, Courmesnil, Bayette, le Clerc, tous Iesuites, capables & obligez de prendre & estudier les leçons des Professeurs de Theologie & cas de conscience du College de Clermont & d'eniuger, disputer & parler en particulier & en public.

Leurs Constitutions, Partie 4. chap. 13. pag. 161. sont telles: *Nec solum Lectiones sint quæ publicè prælegantur; sed Magistri etiam diuersi pro captu & numero audientium constituantur, qui quidem Profectum uniuscuiusque ex suis Scholasticis speciatim procurent & lectionum rationem exigant.* Et apres auoir parlé des Escholiers des lettres humaines, elles adioustent; *Et his, ac multo magis facultatum superiorum studiosis crebras disputationes imponant; quibus dies & horæ certæ constituentur.* Et au ch. 15. Quarto quoque anno ordinariæ cursus (Theologiæ) inchoabitur, sic libris prælegendis distributis, vt quolibet

quatuor annorum quibus studiosus inchoare possit; & quod reliquū est incæpti quadriennij, & eius quod sequitur quadriennij, usque ad illū terminū, unde incæperat, audiendo, quatuor annis peragere omnino cursum Theologia possit.

Ayans donc pleinement connu, comme on n'en peut aucunement douter, ce que leur Professeur a publiquement enseigné, dicté & soustenu, non seulement ils l'ont approuvé, en ce qu'ils ne l'ont point ni corrigé, ni condamné, ni obligé de reconnoistre publiquement sa faute & reparer par vne solemnelle retractation le scandale, l'offense & la ruine que *sa mauuaise doctrine* auoit causé dans la creance & conscience de ses disciples & auditeurs, & empescher les dangereuses consequēces de ses enseignements, mais encores ont souffert ou plustost ordonné, qu'il dictast les mesmes escrits & donnast en public dans la mesme classe, les mesmes pernicieuses instructions durant plusieurs années consecutives, authorisans par ce consentement de

9
plusieurs années & par cette souffrance, ou plustost approbatiō manifeste, la doctrine de leur *Casuite*, & la rendans commune non seulement à tous ceux de leur Compagnie, mais à plusieurs autres personnes qui apres l'enseignent & la pratiquent, & font enseigner & pratiquer en diuerses Provinces.

CES *Raisons & preuues* sont d'autant plus cōsiderables que les *Iesuites* sont obligez par leurs Constitutions, de ne tenir point de doctrines différentes, ny en leurs *predications*, ni en leurs *leçons*, ni en leurs *liures*. Leurs Constitutions le portent, ch. i. part. 3. pag. 98. *Doctrina differētes non admittantur, nec verbo, in concionibus vel Lectionibus publicis, nec scriptis libris.*

Suiuant ces Constitutions & obligations d'estre *uniformes* en leur doctrine, comme ils sont instruits és mesmes escholes, esleuez sous mesme Institutiō & animez d'un mesme esprit, ils ont coustume de soustenir ce que les partiqualiers de leur Societé proposent en public, & se portent plus-

roft à defendre communement des opinions pleines d'absurdité, que de condamner veritablement vn de leurs compagnons qui les aura auancées.

ESTIENNE BAVNI de leur Société, ayant enseigné publiquement durant plusieurs années leur *Theologie Morale* dans le mesme College de *Clairmont* en cette ville de Paris, apres auoir quitté la regence & la classe, a redigé par escrit partie de ses leçons, & a fait cette iniure à nostre Nation de faire seruir nostre langue à la publication d'une infame *Somme de pechez*, qui autorise le mespris des puissances establies de DIEU, tant spirituelles que temporelles, les enuies, les haines irreconciliables, le mensonge, & parjure, l'iniustice, les violences, l'incendie, le larcin, mesme le domestique, les fraudes des banqueroutiers, l'usure, & autres detestables pechez & desordres, contre toute police & discipline Ecclesiastique & ciuile. BARTHELEMY IACQUINOT leur Prouincial de France, a donné permission d'imprimer ce liure, & certi-

fic, que trois PERES de la Compagnie qui l'ont veu par son ordre, assurent qu'il est profitable au public, & ne contient doctrine aucune, qui ne soit bonne & digne d'estre veuë.

Cependant BAVNI attaquant l'auctorité des *Euesques* mesprise aussi celle des PAPES & leurs BVLLES, de mesme que son confrere HEREAU, qui enseigne qu'en France à cause du *duel*, on n'encourt point de censure ni de peine Ecclesiastique portees par le CONCILE DE TRENTÉ ou par *Gregoire xiii. & Clemens viii.* par ce que, ainsi parle-t'il, toutes ces choses ne sont pas encore assez receuës en France. Et BAVNI traitant la question, si les *Religieux* peuuent absoudre des cas reservez aux *Euesques* en son chap. 33. page 809. & 810. de l'edition de l'an 1641. apres auoir propose l'opinion des Docteurs qui soustiennent, qu'ils n'ont pas ce pouuoir, & qu'on ne peut defendre l'opinion contraire depuis que la congregation des CARDINAUX faite sur ce suiet le 18. Nouembre, 1628. par l'ordre d'*Urban viii.* a derogé aux

privileges des Reguliers , touchant
 le pouuoir d'absoudre des cas reser-
 uez aux Euesques , dit en ces termes ;
*Neantmoins pour ce que la pratique est
 contraire pour l'égard des cas que lesdits
 Euesques se seroient particulièrement
 reservez, & qu'elle est appuyee sur la con-
 cession des Papes Sixte iv. Urbain iv.
 Paul iii. & Pie v. & non renouuee
 depuis efficacement d'aucun autre ;*
 Je ne puis ni ne dois reprendre ceux
 qui s'accōmodans à cette opinion absol-
 uent des pechez que les susdits Euesques
 se seroient reservez. Et quand à ce
 que Diana escrit du sentiment des
 Cardinaux , l'on respond I. qu'il n'a
 iamais paru par deçà les Monts avec
 les formes requises a obliger lesdits
 Reguliers , qui sont la publication &
 reception d'iceluy par ceux à qui le
 fait importe. II. On dit avec P. Ledes-
 me au Tome I. du Sacrem. de Penit.
 Chap. 13. diffic. 7. Sanch. liu. 8. de
 matri. disp. 2. n. 10. Valer. au liure
 des differences en l'un & l'autre for.
 verbo absolutio diff. 1. n. 20. Pontius lib.
 5. de mat. chap. 13. parag. 2. nomb. 7.
 Diana tom. 10. resol. 29. que les aduis

& declarations des Cardinaux ne tiennent lieu de loix, consequemment qu'elles n'obligent à rien.

Mais BAVNI ne parle pas seulement des resolutions des CARDINAUX, il parle aussi des *Bulles des Papes*, quand en son chap. 41. pag. 1025. il dit, *ceux qui ne goustent ce discours obiecteront que Clement VIII. l'an 1601. & Paul V. l'an 1617. ont reuouqué toutes les grâces accordées aux Reguliers par eux, & leurs Predecesseurs, avec defenses sous peine d'excommunication d'absoudre d'aucun cas que les Euesques se seroient reserues: Mais no^o disôs premieremēt, que cette BVLLÉ n'a esté iamaïs receuë ni publiée en France. II. qu'elle ne comprend autres personnes que celles qui sont au delà des Monts.*

En ces passages, la Cour considerera, s'il lui plaist, non seulement le peu de reuerence que ces personnes, quand il y va de leur interest, portent au saint SIEGE; mais encore les formalitez qu'ils recherchent pour inualider des BVLLÉS, lors qu'elles sont conformes à l'ancien ordre & pratti-

que de l'Eglise, mais contraires à leurs pretensions & entreprises; sans considerer que le pouuoir qu'ils s'attribuent au preiudice *des Euesques*, Curez & Vniuersitez; & que toute leur Institution n'est fondée que sur des *Bulles*, qui n'ont pas esté receuës par autres formes, que celles qui reuoquent les priuileges preiudiciables à la discipline & autorité *des Euesques*, Curez, Vniuersitez & autres, auxquels le fait importe.

LA PVISSANCE DES ROYS & des Seigneurs & Princes temporels, est visiblement offensée dans la mesme Somme des pechez de BAVNI ch. 30. conclusion 4. pag. 751. & 752. en ces termes; *C'est aussi un effet de cette censure que l'Excommunié ne puisse faire fonction aucune qui appartienne à l'office tant ciuil, qu'Ecclesiastique, dont il est pourueu, qu'avec peché & nullité de tout ce qui en pourroit prouenir. Car au Canon Nos sanctorum, de la cause 15. qu. 6. Gregoire VII. exemptte les subiets d'obeir à leur maistre, quand pour quelque sienne faute il seroit excommunié. Il ne peut donc*

les citer à comparoistre deuant soy, ni les obliger à ce qu'il ordonneroit d'eux & de leurs differens. Qu'il y aye aussi du peché pour lui à exercer lesdictes fonctions, appert de ce que le propre de cette censure, est de priver du bien de la compagnie & communion des fidels, celui qui par quelque sienne faute l'a encourue, comme il se lit au Can. Engeltrudam. cause 3. qu. 4. Il ne peut donc sans peché exercer son office, ni pour le bien du peuple en faire publiquement quelque fonction. Surquoi la Cour remarquera, s'il lui plaist, les raisonnemens & consequences, que BAVNI fait au preiudice de tous ceux, auxquels on peut attribuer le nom de *Maistre*, duquel mot, qui est general, il s'est serui avec dessein, encore qu'il ne soit point es Canons qu'il allegue.

LE Commandement necessaire d'aymer son prochain comme soi-mesme, est violé en faueur de l'envie, quand BAVNI page 122. & 123. dit qu'estre marri du bien de son prochain & en concevoir de la douleur, qui soit de soi desordonnée, n'est pas, à son aduis, pe-

ché mortel , & en adiouste une raison qui *authoriserait*, si elle estoit véritable, presque tous les pechez qui se commettent au monde : Car le bien, ce dit-il, qui se trouue es choses temporelles est si mince & de si peu de consequence pour le Ciel , qu'il n'est de nulle consideration deuant DIEU & ses Saints.

LES Chrestiens demandent tous les iours à Dieu qu'il leur pardonne, comme ils pardonnent à ceux qui les ont offensez , & sont instruits par l'E-uangile , qu'ils seront traictez de la part de Dieu, comme ils traicteront leur prochain. BA V N I apres auoir proposé page 124. *Qu'une des marques de haine à l'endroit du prochain, est de ne le vouloir hanter, en auoir vne alienation telle & si violente que pour quoi que ce soit on ne veuille lui parler, lui ayder à son besoin, on bien lui pardonner, quand il reconnoist auoir failli & se met à la raison, dit en la page 125. qu'à manquer à ces choses il croit qu'il n'y a point de peché mortel, sinon en cas de scandale.*

LA TROMPERIE, le mensonge,
les

les equivoques & le pariure à la face des Iuges, & quand l'on est interrogé selon les formes de iustice, sont clairement approuvées dans l'onzième ch. du liure de BAVNI, lors qu'apres auoir enseigné, que les femmes & les enfans peuuent en bonne conscience cacher & retenir du bien au preiudice des creanciers; les femmes, quand par le mauuais mesnage de leurs maris, les enfans, par celui de leurs peres ou meres, sont contraints d'abandonner leurs biens aux creanciers qui en font faire la deguerpie par les mains de la iustice, il adiousté pag. 237. que la femme ou les enfans appelez en iugement, pour se voir condamner à deuoir dire ce qu'ils ont separé, distrait ou usurpé des meubles, heritages & biens du defunt, ne sont en conscience tenus de le declarer, parce qu'ils ne sont interrogez iuridiquement. Ad-ioustez que comme le iuge ne leur peut point oster ce qui leur fait besoin pour mediocrement viure dans leurs conditions, aussi eux ne peuuent estre contraints à le lui abandonner, s'ils ne sont iuridiquement conuaincus d'en estre

faisis. Afin toutesfois qu'ils ne mentent & qu'en le faisant ils ne se pariaient, le sage Confesseur leur dira qu'ils ayent à se former vne conception en l'ame, suiuant laquelle ils reiglent leur response & le serment qu'ils pourront faire par le commandement du Iuge, pour authoriser & faire croire leur ignorance. En second lieu, est à noter, qu'en cette occurence ni la femme ni les enfans des susdits ne doiuent ni peuuent estre forcez par le Confesseur à venir à reuelation des choses ainsi soustraites, quoi que les creanciers en eussent obtenu le mandement, & les lettres monitoires de l'Euesque. Car elles presupposent quelque faute, & icelle mortelle en la personne qui s'en seroit nantie, Car on ne chastie par censures Ecclesiastiques que les coupables & rebelles aux Loix de Dieu, de nature & des Superieurs, au nombre desquels il ne conuient point mettre ni la femme ni les enfans, qui dedans leurs disettes se sont saisis d'autant de biens, les enfans de leurs peres, les femmes de leurs maris, comme il en faut pour escharse-

ment & modestement viure.

PAR CES instructions de BAVNI l'injustice est authorisée, la simplicité & la verité ruinée, l'obligation de répondre véritablement au Iuge & selon sa pensée, comme il l'exprime en ses interrogations, est abatuë, tout ordre de Iustice renuersé, & le saint nom de Dieu, que les Iuges emploient pour obliger les hommes à dire verité, est exposé à mépris & à moquerie. La Confession mesme est rendue inutile, & le pouuoir de l'Eglise est aneanti, puisque le Confesseur n'aura droit, ni pouuoir d'obliger à obeir aux mandemens & lettres monitoires de l'Euesque. Et ces deux grands moiens si necessaires pour rendre la iustice & venir à la cognoissance des crimes, à sçauoir le serment deuant les Iuges & les monitoires des Euesques, portans excommunication à ceux qui ne reueleront pas, sont abolis & aneantis.

ON auroit peine à croire qu'un Theologien fauorist si ouuertement les violences, les incendies & bruslemens de granges & maisons, que d'o-

ser dire, que celui qui a prié de battre son voisin ; ou de brusler sa grange, *n'est point tenu* de restituer le dommage, qui aura esté fait à sa priere. BAVNI l'enseigne avec autant d'insolence que d'inhumanité ; Et n'a pas eu horreur de choquer si sensiblement le sens de tous les hommes, que de soutenir qu'on n'offense point la Justice, quand on prie quelqu'un de *frapper & battre* un autre, ou de *brusler sa grange* ; comme si l'injustice consistoit seulement en l'action du corps par laquelle on commet l'outrage, non en la volonté de nuire, qui cause l'iniure & le dommage. Et en parlant de la resolution d'un scelerat, qui s'engage à la priere d'un autre, à *frapper & outrager* des hommes & à *brusler des granges*, n'a pas eu honte de dire, que *rien ne l'y oblige* que la bonté, la douceur & la facilité de son esprit ; comme si ces iniustices, iniquitez & violences extremes estoient seulement effects de la douceur & bonté d'un naturel facile & non d'une barbarie & fureur extraordinaire. Ses termes sont au ch.

13. pag. 307. & 308. qu. 10. *Si l'on est obligé de restituer les dommages, qui seroient arriuez d'une action, qu'un tiers auroit faite à nostre instance. Par exemple quelqu'un priera vn soldat de frapper & de battre son voisin, ou de brusler la grange d'un homme qui l'aura offensé. L'on demande si au defaut du soldat, l'autre qui l'a prié de faire tous ces outrages doit reparer du sien le mal qui en sera issu. Le disent Caiet. &c. Mon sentiment n'est pas le leur car a restituer nul n'est tenu, s'il n'a violé la iustice. Le fait-on quand on se soumet à autrui? quand on le prie d'une faueur? quelques desirs que l'on aye de l'obtenir par son moyen, quelques demandes que l'on lui en face, il demeure tousiours libre de l'octroyer, ou la nier. de quelque part qu'il encline, c'est sa volonté qui l'y porte. rien ne l'y oblige que la bonté, que la douceur & facilité de son esprit. Si donc il ne repare le mal qu'il aura fait, s'il ne restituë les choses en leur premier estat, il n'y faudra astreindre celui à la priere duquel il aura offensé l'innocent.*

Si ces raisonnemens ont lieu, ceux

qui conseillent & qui commandent le crime, qui promettent & donnent de l'argent pour le commettre, n'offensent point la iustice, & ne sont point subiects à restitution, puisqu'ils n'agissent que par vne autre personne, qui non obstant leurs sollicitations, demeure libre de faire ou ne pas faire ce qu'ils desirent.

Il monstre aux *debiteurs iniustes* & de mauuaise foi, aux *banqueroutiers* & à leurs *confidens* & amis, vn abominable moyen pour retenir le bien des creanciers, & louë, comme il est dit en vn autre sens dans l'Euangile, le Fermier ou le Receueur d'iniquité, qui se fait des amis du bien d'autrui afin qu'ils le nourrissent. Ses instructions & sa doctrine portent au ch. 13. qu. 9. pag. 306. *Qu'un homme oberé & redeuable de sommes immenses a droit de disposer du bien qu'il possède & de le donner & que celui qui l'a receu en don n'est point obligé de le rendre aux creanciers, s'il n'y est contraint par iustice.*

Par ce discours, il estouffe la ve-

ritable iustice, qui oblige les hommes en conscience & la reduit toute aux formes exterieures, qui sont trop foibles pour empescher le mal, si elles ne sont secourues par la Religion, & lesquelles il a dōné lui mesme le moien d'eluder & rendre inutiles par ses dānables inuentions & conseils, de *tromper les Iuges* par equiuoques & frauduleuses responses.

Il FAIT vne merueilleuse ouuerture & donne vne estrange licence de *desrober*, quand au ch. 10. pag. 220. il dit avec SA son confrere, *qu'il est fort probable*, que celui, *qui per vices pauca alicui est furatus, cum ad notabilem quantitatem peruenerit*, n'est obligé sur peine de damnation eternelle à rien restituër. Et peu apres, *la raison en est forte*. car à reparer le tort dont on auroit este la cause, nul n'est tenu sous peine d'encourir la damnation eternelle, que quand à le faire l'on n'auroit peché que *ueniellément*, d'autant que telle obligation n'est effet d'autre coulpe que mortelle. Or ces menus larcins qui se font à diuers iours & repries, à un homme ou plusieurs, quel-

que grande que puisse estre la somme de laquelle l'on se feroit accommodé ne seront jamais mortels.

IL instruit même les domestiques à dérober sans en faire scrupule & sans en tenir leurs consciences chargées, & montre aux serviteurs & aux enfans, des occasions esquelles selon s^{on} aui, ils ont droit d'vsurper & de s'approprier le bien des familles; & porte par ce moyen l'iniustice & la licence de voler à tel point, qu'il est impossible d'en eüiter le dommage, puisque les peres ne peuuent chasser leurs enfans, ni les maistres estre & agir sans serviteurs, & qu'on ne peut oster la confiance necessaire entre les parens & les enfans, les maistres & les serviteurs, quoi que par les instructions de BAVNI elle soit attaquée & offensée autant que le bien des familles.

L'Escrature Sainte assure vers. 24. chap. 28. des Prouerbes, que celui qui soustrait quelque chose à son pere & à sa mere, & dit que ce n'est pas peché, est participant du meurtrier. BAVNI toutesfois ne craint pas de participer au crime d'homicide, &

rafche de prouuer, que les enfans ne pechent pas mortellement en volant leurs parens, d'autant, dit-il au ch. 10 pag. 205. que les parens ne font censez les vouloir obliger à n'entreprendre sur le leur sous cette peine, y aiant de l'apparence qu'ils aymeroient mieux voir tous leurs biens fondus entre leurs mains, que leursdits enfans en disgrâce avec Dieu. Comme si la bonté, non seulement des parens, qui aiment leurs enfans, mais de tous les Chrétiens, qui doiuent aimer leurs ennemis & prier pour ceux qui leur font iniustice, les rendoit en cela plus dignes d'estre offensez : Et s'il y auoit moindre peché à les voler & outrager, par ce qu'ils souffrent plus doucement & pardonnent plus aisément l'iniure, & sont tousiours plus disposez à perdre tous leurs biens, qu'à desirer la damnation d'un homme.

En ce mesme chap. 10. qu. 4. pag. 209. & 210. Si les enfans sont en tout temps reprehensibles de s'usurper ce qui est en la main de leurs peres ? Il est certain que non. Premièrement quand

ils y sont portez d'un desir d'assister
ceux qu'ils voient à leurs yeux reduits
à l'extreme misere. Car en ce cas ils
font d'eux-mesmes ce dequoiles peres
leur deuroient donner charge & qu'
ils ne peuuent prudemment improu-
uer. Secondement quand avec quelque
apparence de raison ils se promettent
tant d'affection de leurs peres enuers
eux, qu'ils ne leur refuseroient point
ce qu'ils prennent, s'ils le leur deman-
doient. Car lors ils ne sont pas tant
marris de ce que l'on leur prend, que
de la façon. Puis donc qu'au tes-
moignage des Docteurs, chez Leon ch.
12. doute 8. n. 49. ce n'est peché
mortel de s'vsurper quelque chose de
celui, qui la donneroit si l'on lui de-
mandoit, bien qu'il ne gouste & n'ap-
prouue pas la façon avec laquelle l'on
l'en priue, il faut croire qu'au cas pre-
sent lesdits enfans n'offensent point
Dieu mortellement. Troisiemement,
quand ils ne prennent que le leur,
comme il arrive, si le pere qui manie
les Benefices de son fils en recueilloit de
grands aduantages sans lui en faire
part, que bien escharsment. car com-

me lesdits reuenus appartiennent au fils, non au pere, il se les peut vendiquer par tout où il les trouue. Que si le respect qu'il doit à son pere l'en empesche, poterit vti compensatione occulta vel repetere ab hæredibus. En quatriesme lieu, quand les peres pour qui ils sont employez & s'employent tous les iours, ne les contentent pas.

LES VALETS ainsi que les ENFANS sont establis iuges en leur propre cause au mesme chap. 10. pag. 213. & 214. Où il est escrit si les valets qui se plaignent de leurs gages les peuuent d'eux-mesme croistre en se garnissant les mains d'autant de bien appartenant à leurs maistres, comme ils s'imaginent en estre necessaire, pour esgaler lesdits gages à leur peine. Ils le peuuent en deux rencontres, & ce sans faute. Le premier, est quand ils n'ont conuenu du prix deu à leur peine, qu'avec condition, que si leurs Maistres les recognoissent utiles au bien de leurs affaires, ils l'iroient augmentant iusques à la somme que raison & iustice demandent; Et neantmoins lesdits Maistres & Maistresses n'en font rien. en ce cas là ne

sont les seruiteurs & seruantes blasma-
bles qui font leurs mains des biens de
teursdits maistres, iusques à la concu-
rence de la somme requise à mettre é-
galité entr'eux & lesdits ausquels ils
seruent, la recompense & leurs merites.
Car ce dont ils se vont en tel cas faifif-
fant leur est veritablement deu, & se
l'attribuan eux-mesmes par leurs
mains ne font que ce à quoy leurs Maist-
tres estoient tenus en leur particulier.
L'autre occurence en laquelle ie crois
les seruiteur. exemts de faute, c'est
lors qu'ils s'accomodent de ce qui
n'est à eux, mais à leurs Maistres;
ce sont ses propres termes.

L'VSURE, qui est vn mal ruineux,
non seulement aux pauvres, que la
Religion & charité Chrestienne re-
commandent si soigneusement; mais
encore aux villes entieres & aux E-
stats, est non seulement approuuée,
mais enseignée & la façon & les mo-
delles en sont representez & exposez
au chap. 14. où apres auoir ouuert
en la page 118. vne merueilleuse en-
trée & fourni vn tres-pernicieux pre-
texte à l'usure, à sçauoir qu'il semble

n'y auoir pas de mal à pactiser tout ce qu'il est permis d'esperer, de donner, d'accepter; & que le pact qu'on en feroit n'est prohibé, non plus que de recevoir parole de celui qui emprunte, qu'en cas qu'il ne satisfasse au creancier en lui rendant ce qu'il lui a presté au temps déterminé par entr'eux, il augmentera de certaine somme d'argent le capital.

En la page 325. *plus icelui danger sera grand*, plus la somme notable, les personnes moins solubles, plus pourra-on exiger d'elles. Instruction cruelle & inhumaine, qui autorisant l'oppression des pauvres, approuue & iustifie la principale iniustice, à raison de laquelle Dieu tesmoigne par ses Prophetes, qu'il a l'vsure en abomination.

Et en la page 334. *Celui qui a besoin d'argent venant à expliquer le desir qu'il a d'en recouurer, le creancier pourra respondre, ie n'ay point d'argent à prester, si bien à mettre à profit honneste & licie, si vous voulez la somme que demandez pour la faire valloir par vostre industrie à moitié perte,*

moitié guain , peut estre m'y resoudra-
 ie. bien est vrai qu'à cause qu'il y a trop
 de peine à s'accommoder pour le profit,
 si vous m'en voulez assurer vn certain,
 & quant & quant aussi mon sort prin-
 cipal, qu'il ne courre fortune, nous tom-
 berons bien tost d'accord & le con-
 tract se passera. Il ne faudra prendre
 le guain au commencement du contract,
 car il n'est encore deu , ains au bout de
 l'an , ou demi an , ou de quartier en
 quartier. Ne fust que le creancier crai-
 gnist probablement qu'il ne peust re-
 couurer ce qui lui seroit deu , que l'on
 appelle communément interest , au
 bout de l'an sans proceç. Et peu apres
 en la pag. 335. il ne faut pas que ce qu'
 on demande soit excessif, communément
 il se faudra tenir dans l'Ordonnance &
 se contenter du prix que le Roi permet
 par icelle, qui est au denier douze pour
 les marchans , & au denier dix-huit
 pour les autres, ne fust que pour cer-
 taines considerations dont le iugement
 est reserué aux SAGES, il fallust l'ac-
 croistre ou le diminuer

Et la page 337. Est à noter que la
 coustume porte, que lors que le terme

*du payement est échéu, si le debiteur n'a
moien de payer le principal, il va
paier & aduancer l'interest encore pour
un an, & son creancier lui baille vn
prolongement signé de sa main, en
cette forme; Je soubs-signé proroge à
vn tel le terme à me paier la somme de...
qu'il me doit, comme appert par con-
tract receu partel Notaire, & ce iusqu'à
vn tel iour, sans deroger audit Contract.
Fait,*

TANT de pernicieuses doctrines &
plusieurs autres semblables, conte-
nuës dans cette *Somme de pechez*,
n'ont point esté retractées par BAVNI
ni mesme desapprouuées par autres
IESVITES : & quoi qu'apres que ce
mauuais & dangereux liure a paru,
on ayt fait & publié à Paris deux *Ex-
traits* de plusieurs detestables maxi-
mes y contenuës, afin de les faire con-
damner; quoi que par le soin & au-
thorité de nostre S. Pere le Pape VR-
BAIN VIII. la Congregation des Car-
dinaux ait censuré à Rome dès le 26.
Octob. l'an 1640. cette *Somme des pe-
chés* avec deux autres liures du mesme
Iesuite, l'un intitulé *Theologia Mora-*
a Et en la pag. 238. *Ceux qui par trafics, nego-*
ciatiōs, pactes, ou contracts usuraires, qu'ils croient
estre bons, ont gagné de grands biens, ignorās in-
uinciblement que telles façons d'agir fussent re-
prouuées & illicites, ne sont obligez à faire restitu.

lis, & l'autre *Prattique du droit Canonique*, les IESVITES n'ont pas laissé de faire imprimer l'an 1641. pour la sixiesme fois ce mal-heureux ouvrage qui se debite encore chez *soly* à l'en-seigne du Phoenix, dans la rue saint Iacques à Paris, nonobstant cette condamnation du saint Siege & ce que l'*assemblée* du Clergé tenuë à Mantes a déclaré à l'encontre, au mois d'Auril, l'an 1642. Au contraire en se bandant contre ces grandes & saintes autoritez, & en s'efforçant d'establiir & de prouver, au lieu de reuocquer & detester les erreurs de leur *Casuiсте*, ils ont fait imprimer un *liure*, qui se vend chez le mesme *Soly*, duquel la premiere partie a pour titre *Catalogus Authorum quos cum P. BAVNI Doctor Theologus censura notanda iudicauit*: L'autre, *Catalogus alter Authorum quos Maij 15. in publico facultatis Theologica confessus Doctor cum P. BAVNI censura notandos putauit*; ou quoi que le nom de l'Autheur ne soit pas exprimé, non plus que celui de l'Imprimeur & Libraire, on peut veoir par l'Epistre qui est

est deuant la seconde partie , que le Liure n'a pas esté fait sans la cognoissance de BAVNI , & dans la page 24. de la mesme seconde partie ; il paroist clairement que BAVNI en est le fabricant & l'auteur.

CE mesme consentement , vnion & correspondance des Iesuites se voit aussi manifestement dans le liure qu'ils ont fait curieusement imprimer au nom de toute leur Prouince de Flandres , pour celebrer & vanter hautement les actions, les vertus, la doctrine, l'honneur qu'ils ont tiré de leurs pretenduës persecutions & la puissance de leur Societé. Le liure porte pour titre ; *Imago primiseculi Societatis Iesu à Prouincia Flandro-Belgica eiusdem Societatis representata Antuerpia , ex Officina Baltazarus Moreti , anno Societatis seculari 1640.* En laquelle année, ils ont célébré partout avec de grandes pompes & magnificences, l'an seculier & centiesme de leur Institution.

Sans s'arrester à plusieurs choses vaines & ridicules, qui y sont ramassées, comme entre-autres quand en

la page 236. il est dit que ~~franc~~ Iean l'Euangeliste paroissant pour la troisieme fois à vn ieune homme Parisien, qui doutoit s'il se feroit Capucin ou Chartreux, lui donna le choix de trois Ordres, & disparoissant lui mit en main vn billet, où le noms des Capucins & Chartreux estoit en lettres d'argent, & celui des Iesuites estoit escrit en lettres d'or. Sans remarquer vne infinité d'autres semblables vanteries, dont le liure est rempli; L'Vniuersité a iugé à propos d'informer la Cour d'autres imaginations y continuës, qui peuuent estre tirées à consequence.

Il est escrit dans la page 72. de certe Image de la Societé, que deux petits liures, ouurages de leur Fõdateur, Les Exercices spirituels & leurs Constitutions, ont esté dictés par la sainte Vierge Marie. leurs termes sont; *Scriptit illa quidem Ignatius, sed dictante Maria.* Et touchant les Constitutions, qu'elles ne sont pas seulement de la Vierge, mais encore de Nostre Seigneur Iesus-Christ. Leurs paroles meritent qu'on les remarque,

page 74. *Nec minus Societatis Constitutiones ac Leges opus sunt, ut humanum magis, ita dignissimum diuæ Virgine Magistra. In his sanctus Pater (Ignatius) cum se nobis, quamuis id non ageret, suo penicillo depingeret, in quodam Commentariolo testatur ad se frequenter venisse Mediatore, quorum nomine Iesum designat & Mariam, ne nesciat Societas parere se legibus ab Iesu & Maria magis quam ab Ignatio latis.*

Dans le chap. 8. du 5. liure, és pag. 648. & suivantes, ils taschent de persuader que c'est vn priuilege de leur Société, que nostre Seigneur IESVS-CHRIST vient au deuant du Iesuite qui meurt, pour le conduire en Paradis ; *Hoc est hominum Societatis IESV priuilegium ut mortuum Iesuitam obuius IESVS excipiat.*

Priuilege d'autant plus grand, qu'ils s'attribuent encores celui-ci, qu'aucun, qui meurt dans leur Société, ne sera damné. Ce qu'une de leurs visions restraint à trois cent ans ; une autre le propose sans limites de temps & de siècles & indifferemment pour tous & chasque Iesuites. *Seito*

Marce Frater, (ce sont, disent-ils, les paroles de leur Pere François Borgia, qu'ils assurent auoir esté fidellement transcrites) *DEVM impense amare Societatem, eique concessisse beneficium quod olim ordini S. Benedicti, nimirum ut trecentis primis annis, nemo, qui in ea ad mortem usque perseverauerit, damnetur.* L'autre tesmoignage est fondé sur l'autorité d'un autre Iesuite rapportant qu'un Religieux d'un Ordre tres-austere, lui disoit en mourant; *Felicem te, ô Pater, cui contigit socium esse eius Ordinis, in quo qui decedit, vita fruitur sempiterna: & adioustoit avec gémissement; Seruari quidem ex suo Ordine quam plurimos, sed non omnes: Ipsius autem Societatis omnes omnino ac singulos ad mortem usque in ea si constiterint, esse seruandos.*

Mais outre ces imaginations & visions importantes pour le dessein de ceux qui les produisent, ce liure seculier contient plusieurs autres choses dignes de grande animaduersion, comme ce qui est contraire à la puissance des Rois, des Estats & Polices,

dans la page 632. Où ils se glorifient de ce que P I E V. exempta l'Ordre des Iesuites, de la iurisdiction & puissance de *tous, excepté de la sienne*; laquelle toutesfois, comme il a esté ei-deuant remarqué, ils ne font pas difficulté de mespriser & reietter, lors qu'elle n'est pas fauorable à leurs pretensions.

Les chap. 6. & 7. du 4. liure de cet Image de la Societé, ne sont pas seulement vne image & representation de leur vanité, mais sont des mespris effectifs & d'atroces iniures qu'ils font à l'Vniuersité & aux Curez de Paris & à plusieurs Ordres de Religieux, & autres, qui ont esté ioints contre-eux en cause avec l'Vniuersité & encore au iugement des Euesques, & à l'autorité de la Cour. Ils racontent à leur mode & à leur aduantage les oppositions qui furent formées à leur reception, les Decrets des Theologiens, la décision celebre de Messire Eustache du Bellay Euesque de Paris, les refus que le Parlement a fait de les admettre, les Arrests donnez contr'eux, leur exil &

rappel, & les diuers & tres-exprés cōmandemens du Roi, & leur reſta-blifſement par plein pouuoir & puiſſance abſoluë.

L Vniuerſité ne doit point negliger les offenſes faites à la memoire des Aduocats qui l'ont autresfois genereuſement defenduë, ni manquer à ſe plaindre des calomnies & medifan-ces qu'ils ont ſemées contre Maiſtre Eſtienne Paſquier, eſcriuans en la pag. 503. *Stephanus Paſchaſius exercitata in calumniando impudentia. Quid non conuictiorum enomuit os illud impudens in ſectam, ut aiebat, ambitioſam & fucata Religionis plenam?* Et contre Maiſtre Antoine Arnaud, duquel ils ne ceſſent pas encore à preſent de perſecuter la poſterité, accuſans fauſſement d'heréſie yn homme, quia touſiours veſcu irréprochablement dans l'vnité & l'obeiſſance de l'Egliſe Catholique; *Pro Academia verba fecit, ce diſent-ils en la pag. 504. Antonius Arnaldus, de Caluini ſecta calumniator vehemens, inſenſus noſtro nomini, ſi quis alius, inſaniam in nos habuit Catilinariam.*

Mais ce n'est pas merueille, qu'ils traittent de la sorte les Aduocats, qui ont parlé pour l'Vniuersité, comme ils traittent aussi M^r Louis Dolé, qui plaida pour les Curez, M^r du Mesnil, qui parla pour le Roi, Messieurs les Presidens de Harlay & de Thou, & Messire Eustache du Bellai Eueque de Paris, puisqu'ils reiettent sur l'heresie la cause de tous les obstacles, qu'ils ont trouuez en France, & en taxent ouuertement leurs Iuges, au commencement de la page 503. *Nonnullos è Senatoribus occultè hæreticos languentium aut inuidorum studia facile suas traxisse in partes. & erant eiusmodi tempora, ut ne exasperarentur animi, pro potestate agendum Regi non videretur;* De sorte, qu'à leur auis, le Parlement n'estoit composé que d'heretiques, de gens lascles & languissans & d'hommes qui portoient enuie aux Iesuites: & n'y auoit que la difficulté du temps, qui enpeschast, que la Cour ne fust obligée par vn pouuoir absolu de receuoir contre son gré cette Societé.

En parlant plus generalement dans la page 501. ils osent dire, que la seu-

le heresie, qui a empesché qu'ils fussent receus, causa les oppositions de l'Vniuersité de Paris, & fit donner les Arrests de la Cour; *Eadem illa (hæresis) auita fidei, eadem patrie communis Erynnis fuit, eadem omnium Societati malorum causa. Per suos illa mendaciorum MINISTROS sapientissimam partem Vniuersitatis, gravissimum Senatum regium induxit in fraudem. Hinc à paucis Sorbonicis publico decreto damnata societas, à maleuolis de regio senatu eiecta in superatque proscripta est. Et encores en la pag. 655. Ante Senatorium palatium stantem adhuc infamem Pyramidem in religiosissima Societatis dedecus nuper erectam ab iis, qui hæreticorum plus a quorebus aliquando studentes, Sociorum innocentia vel ignaros, vel inuidos auscultarant ... deiecit Rex, iniquissimum infamia nunquam promeritè monumentum.*

Si les Iesuites disent en France que ce sont des Flamens qui parleut selon leur sentiment; On leur respond, que c'est vn monument erigé à la gloire de toute la Societé, dans la grande solemnité de son année scu-

liere , non par vn seul particulier ,
 mais par toute vne de leurs plus cele-
 bres Prouinces, dans vn œuure tres-
 soigneusement imprimé , pour estre
 distribué par l'Vniuers ; comme il a
 esté composé sur les instructions &
 memoires fournis par leurs confreres
 de toutes les autres nations , & prin-
 cipalement de la France. On leur
 respond encore ce, que cette Image
 seculiere exprime & represente en sa
 page 35. de la concorde & vnion
 admirable, non seulement des volon-
 tez, mais aussi des opinions & senti-
 mens de tous ceux, qui composent
 cette Societé. *Ac dispersa quidem sunt
 per omnes orbis angulos Societatis mem-
 bra, tot nationibus regnisque diuisa,
 quot limitibus tellus, sed hac tantum-
 modo sunt intervalla locorum, non men-
 tium, discrimina sermonis, non pectoris;
 colorum dissimilitudo, nō morum. In hac
 familia idem sentiunt Latinus & Gra-
 cus, Lusitanus & Brasilius, Hibernus
 & Sarmata, Iber & Gallus, Britannus
 & Belga. Atque in tam disparibus ge-
 nris nullum certamen, nulla conten-
 tio; nihil ex quo sentias plures esse.*

Cette correspondance & commu-

nion d'esprits & de pensées, qu'ils disent estre si generale, ne paroist point ailleurs plus manifestement, qu'en la pernicieuse doctrine, qui touche la seureté de tous les Estats & le repos de toutes les Nations interessées dans la conseruation de l'autorité & iuste puissance & de la vie de leurs Rois & Princes souuerains; en laquelle doctrine leurs Autheurs ont escrit qu'ils sont tous vn.

Outre ce qui est dit sur ce sujet, dans la Requête du 5. de Mars, & plus amplement expliqué dans le premier des Aduertissemens, ioints à ladite Requête; l'Vniuersité nomme à la Cour plusieurs Escriptuains Islesuites, de ceux qui sont venus à sa connoissance qui ont enseigné, & quelques-vns en differens liures & en plusieurs ouurages, la doctrine preiudiciable à la Souueraineté & aux personnes sacrées des Rois. Ces Autheurs, entre lesquels on en reconnoist qui sont natifs de France, esquels l'Institution & l'esprit de leur Societé a preualu sur l'amour de leur patrie, & sur le deuoir & naturel François, sont Iean Mariana, Caro-

lus Scribanus, sous le nom de Clarus
 Bonarscius, Robert Bellarmin, Gre-
 goire de Valence, Jean Asorius,
 Jean Guignart, Jacques Gretser,
 Alphonse Salmeron, François Sua-
 rés, Leonard Lessius, Jean Ozorius,
 Pierre Ribadeneyra, Andreas Eudæ-
 mon Ioannes, Louis Richeome,
 Pierre Coton, Martin Becan, Fran-
 çois Tolet, Sebastien Heisius, Louis
 Molina, Emmanuel Sa, Gabriel
 Vasqués, Heribert Rosuueidus,
 Cornelius à Lape, Antoine San-
 tarel, François Garasse, Cosme
 Magalianus, & les nouveaux Ca-
 suistes Estienne BAVNI & HEREAV.
 Auquel nombre si l'on adioust les
 Escriuains de leurs lettres annuelles
 & ceux qui loient dās leurs liures de
 Bibliothèques & Catalogues, les Au-
 theurs & ouurages contenant ces
 mauuaises doctrines; si on y veut
 comprendre les Examineurs & Ap-
 probateurs, qui ne peuvent estre
 pour chascun liure, moins que trois
 Theologiens Iesuites, & sont souuent
 en plus grand nombre, outre le Pro-
 uincial & mesme le General, qui selon

leurs Constitutions part. 3. ch. 3. pag. 98. & part. 4. ch. 6. pag. 141. doit spécialement faire examiner & approuuer tous les liures de la Societé, il ne sera pas mal-aisé de iuger, que ce que tant d'Autheurs, tant de Theologiens, de Prouinciaux & Generaux de cet Ordre, ont tant de fois enseigné & approuué, n'est autre chose que le sentiment vniuersel de toute la Compagnie.

Et n'est point arriué, qu'en vne si grande multitude d'Escriuains, dont cette Societé se vante, vn seul ayt entrepris de defendre serieusement la saine doctrine, & soustenir la cause des Rois, contre les mal-heureuses attaques de ses confreres & compagnons.

Que si d'auanture quelques - vns contrains par la iustice souueraine du Roi, & sur vne crainte presente d'estre encore chassés du Roiaume, & pour tromper & appaiser les Princes & les Iuges & euitier le peril, dans lequel ils se trouuoient exposez, ont donné quelques declarations, elles ont esté toutes captieuses, pleines

d'artifices, de fraudes & d'equiuoques, semblables à ces faux sermens, que leurs Casuistes enseignent de faire deuant les Iuges, afin qu'on commette vn pariure sans crainte de se pariurer.

Aussi ne se tiennent-ils engagez par aucune promesse, adueu, desadueu ni declaration, qu'ils aient faite. Ils surprennent les hommes & aduancent leurs affaires par belles & specieuses protestations, qu'ils ne font point de difficulté de mespriser & violer pour l'accroissement & commodité de leur Compagnie, le bien vniuersel de laquelle ils sont obligez par leurs Constitutions pag. 247. d'auoir en toutes choses deuant les yeux.

Ils n'ont esté receus qu'à condition de ne rien entreprendre contre Messieurs les Euesques & contre les Vniuersitez. Apres auoir occupé, & presque esteint les Vniuersitez de ce Royaume, ils taschent iournellement d'enuahir les Colleges de cette Vniuersité, voire d'aneantir l'Vniuersité toute entiere.

Messieurs les Prelats sont continuellement occupez à reprimer & ar-

rester les entreprises que les Iesuites font sur leur iurisdiction & fondions spirituelles, au mespris des Conciles, Bulles des Papes, censures & reglemens, Edits & Ordōnances des Rois & des Arrests des Parlemens, & contre leurs propres declarations & promesses. Ils auoient recognu l'an 1635. que pour le pouuoir de confesser & prescher, ils dependent de Messieurs les Euesques. Louis de la Sale & C. Mallant, deux des principaux d'entr'eux, auoient signē cette declaration solemnelle à la teste de plusieurs Superieurs d'autres Ordres. Et neantmoins, ils n'ont pas cessē du depuis d'enseigner & prattiquer au contraire. mesme dans le libelle, qu'ils ont n'agueres fait imprimer contre deux Docteurs de Sorbonne, qu'ils nomment & traittent iniurieusement, en defendant plusieurs de leurs opiniōs, qui auoient estē recueillies & publiēes sous le titre de Theologie Morale des Iesuites, ils soustiennent leur pretenduē independance des Euesques & se moquent ouuertement de leur declaration de l'an 1635. & font

entendre , qu'elle ne les oblige point & qu'elle a esté donnée & signée par des personnes, qui n'auoient aucun droit ni pouuoir.

Ils n'ont pas esté plus religieux à obseruer la declaration, qu'ils firent soigneusement publier l'an 1626. pour éuiter la condamnation, qu'ils craignoient, à cause du renouvellement qu'ils auoient fait par la plume de leur compagnon Antoine Santarel , de leurs maximes touchant les personnes sacrées & la souveraineté des Rois. Ils detestoient la mauuaise doctrine de leur confrere contre les Rois , & recognoissoient, que leurs Maiestez (ce sont leurs propres termes, assez mal-aisez à entendre) releuent independemment de Dieu ; & promettoient de ne professer iamais opinion , ni doctrine contraire à celle , qui sera tenuë en cette matiere par le Clergé, Vniuersitez du Roiaume & la Sorbonne. Entre quatorze Iesuites, qui signerent cette declaration , on voit les noms de Coton & Garasse , qui auoient imprimé contre la Souuerai-

riété des Rois ; ceux de Petau & Mairat, qui enseignoient la Theologie en mesme temps & College que Bauni ; celui d'Estienne Bauni, dont la doctrine contraire à l'autorité Souueraine des Rois a esté ci-dessus remarquée, & enfin le nom de Royer, qui estoit Prefet des Theologiens au College de Clairmont, pendant qu'Hereau y a enseigné la pernicieuse doctrine contre les Rois & qui l'a approuuée en assistât, selô l'obligatiô de sa charge, aux conferences, disputes & autres exercices, où elle a esté exposée & traittée. D'où l'on peut euidentement recognoistre, comme d'une infinité d'autres semblables exemples, qu'on ne se peut aucunement fier ni asseurer sur les promesses, protestations & declarations des gens de cette Societé, qui continuent tousiours a soustenir leurs maximes & à pousser plus auant leurs desseins, sans moderation & sans bornes, au grand preiudice de l'Eglise & de l'Estat.

CE CONSIDERE', Nossseigneurs,
IL VOVS PLAISE permettre aux Sup-
plians

plians d'adiouster à leur Requête, du 5. de Mars la presente, avec les pieces y attachées, qui sont la Somme des pechez de LAVNI; le liuret intitulé, *Catalogus Authorum quos cum P. BAVNI Doctior Theologus censura notandos indicavit.* Les extraits de leurs Constitutions, ceux de leur liure, qui a pour titre *IMAGO primi seculi Societatis IESV*; actes de leurs declarations & submissions, & autres pieces susmentionnées, que les Supplians emploient, pour monstrier ce que dessus, touchant l'union & conformité des sentimens des Iesuites & touchant leurs pernicieuses maximes, doctrines, & pratiques, à ce que les conclusions que les Supplians ont prises, par leur Requête du 5. de Mars, leur soient adiugées; & vous ferez bien.

Signé DV MONSTIER,
Recteur.

the first of the year 1800

the second of the year 1800

the third of the year 1800

the fourth of the year 1800

the fifth of the year 1800

the sixth of the year 1800

the seventh of the year 1800

the eighth of the year 1800

the ninth of the year 1800

the tenth of the year 1800

the eleventh of the year 1800

the twelfth of the year 1800

the thirteenth of the year 1800

the fourteenth of the year 1800